

1. februar 2019

FM2019/155

Inatsisartut suleriaasianni § 33 naapertorlugu Naalakkersuisut peqquneqarnissaannik Inatsisartut aaliangiiffigisassaattut siunnersuut matumuuna imaattoq saqqummiuppara:

Sulisartup sunniuteqarfiginngisaanik piffissami sivikitsumi tunisassiornermik unitsitsigallarnek pissutigalugu angerlartitaanermi suliffeqarnermi ikiorsiissutinik pissarsisinnaanerup annertu-sitinneqarnissaa, suliffeqarfinni sunngaluartuniluunniit sulianut suogaluartunulluunniit atuutsinneqalernissaa anguniarlugu sulinermi ikiorsiissutit pillugit Inatsisartut inatsisaata¹ nr. 2 majip 15-ianeersup 2014 allanngortinneqarnissaanik kingusinnerpaamik UPA2020-imi siunner-suuteqaqqullugit Naalakkersuisut peqquneqarnissaannik Inatsisartut aaliangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Tungaviliineq:

Inuit nunami tunisassiornikkut sulisut, soorlu assersuutigalugu aalisakkerivimmi, ullumi periarfissaqarput Inatsisartut inatsisaat naapertorlugu suliffeerunnermi ikiorsiissutinik pisarnissamut, tunisassiornerup unikkallarneratigut angerlatitaagallarnermik kinguneqaraangat.

Tunisassiornermik unitsitsineq tassaavoq tunisassianik amigaateqarneq, maskiinanik ajutoorneq, silap ajornera, imaluunniit pissutsit assingusut siumut ilisimaneqanngitsut peqqutigalugit tunisas-siornermik unitsitsineq.

Angerlartitaanermik malittarisassat atuutsinneqartarput taamaallaat nunami tunisassiornermik sulisoqartillugu. Imaappoq inuit tunisassiornermik suliallit kisiisa suliffeerunnermi ikiorsiissutinik pisinnaapput, tunisassiornerup unikkallarneratigut angerlatitaagallarnermik kinguneqaraangat.

Tamanna pissutigalugu, soorlu assersuutigalugu atuarfimmi asaasut suliffeerunnermut ikior-siissutinik pisinnaanngillat, aasaanerani meeqqat atuanngiffeqarnerini angerlartitaap-pataluunniit, taamaalineraniami meeqqat atuarfiat feriarnerup nalaanni matoqqasarmat.

Assigiinngissitsineq taanna Siumumiit iluarinngilarput: Sulisut sullissinerup iluani suliallit allatulli aningaasaqarnikkut toqqissisimanissartik atorfissaqartippaat, tamannami tunisassiornermik suliaqartunut assersuunneqarluarsinnaammat. Suliffeerunnermi ikiorsiissutinik pisinnaasut tassaasariaqarput kikkulluunniit suliffiup unikkallarneratigut angerlartitaasut, sulisullu nammineq pisumut sunniuteqarsinnaanngippat.

¹ Inatsisartut inatsisaat nr. 2 majip 15-nianeersaq 2014

Tamanna tungavigerpiarlugu Siumup siunnersuutigaa, inatsisit atuuttut allanngortittariaqalersut, neriuppugullu siunnersuut ilassinneqarluarumaartoq.

Naalackersuisut kajumissaarpavut inatsisip allanngortinniarneqarneratigit Sulisartut Kattuffiat aammalu Sulisitsisut Kattuffiat qanimut suleqatiserineqassasut, tamatumani NUSUKA aamma GE ilanngullugit.

Aningaasaqarnikkut allaffissornikkullu pisortanut sunniutigisinnaasai:

Siunnersuutip piviusunngortinnissaa siunertaralugu inatsisissatut siunnersuutaasariaqarpoq. Allaffissornikkut tassunga atugassat nutsernissaa, tusarniaasoqarnissaa aammalu inatsisitigit misissuataarnissaa eqqarsaatigalugu sulisup ukiup affaani sulineranik kinguneqassaaq.

Siunnersuutip aningaasaqarnikkut pisortanut sunniutigisinnaasai eqqarsaatigalugit, "Naalackersuisut immikkoortumut 37 / 95 UKA 2016 nassuiaataat" innersuunneqarpoq. Nalunaarummi tassani missingersorneqarsimavoq inatsimmik allannguiniarneq ukiumut ilanngaatisat ilanngaatigereerlugit pisortanut 30 mio. DKK naleqassasoq.

Siumup tassunga tunngatillugu oqaatigumavaa, nalunaarummi inunnik isumaginninnermi aningaasartuutigissamaakkanik sipaaruteqarnissaaq ilanngunneqarpassinngimmata, siunnersuut sipaarnermik kinguneqassammat.

Ilanngulluguttaaq siunnersuutigineqarpoq, inatsimmik allannguiniarneq kommunini allaffissornikkut atuinerunissamik kinguneqassammata missingersuutillu naapertorlugit ukiumut 700.000DKK-mik naleqarpoq.

Aningaasaqarnikkut allaffissornikkullu namminersortunut sunniutigisinnaasai:

"Naalackersuisut immikkoortumut 37 / 95 UKA 2016 nassuiaataat" malillugu taava inatsimmik allannguiniarneq suliffeqarfiit ukiumoortumik akissarsianut atugaasa appartinneqarnissaat naatsorsuutigineqarmat, tassanilu ukiumut ilanngaatisat ilanngaatigereerlugit suliffiutillit 32 mio. DKK naleqassasoq.

Inatsimmik allannguneq aamma kingunerisussaavaa suliffeqarfiit allaffissornikkut aningaasartuutaat ukiumut 500.000 kr.-inik amerleriaateqassammata.

Aningaasaqarnikkut allaffissornikkullu innuttaasunut sunniutigisinnaasai:

Inatsimmik allannguiniarneq aamma kingunerisussaavaa, sulisut tunisassiornermik suliaqanngitsut nunami inuussutissarsiornikkut tunisassiorfinni sulisut qulakkeerneqarmata, angerlartitaanermi aningaasarsiat minnerpaaffiisa 90%-ia tigusersinnaammassuk, angerlartitaanermik nalaani.